

Fundacion na memoria di sr. E.J.(WATTY) Vos:

'Recordando e fecha natal di Watty Vos'

ORANJESTAD - Awe 16 di augustus nos ta recorda e di 81 aniversario di natalicio di un estadista Arubano cu fisicamente no t'ey mas cu nos, pero cu di un manera of otro e ta biba den nos pensamento: Edgar Joaquin (Watty) Vos dfm.

Pa e ocasion aki nos fundacion kier a 'presenta na un manera corto, pero mas concreto cu ta posibel' e carera di sr. Vos, segun e comunicado ricibi di e fundacion.

Na edad hoben Watty a cuminsa practica e deporte rey, esta futbol, cu su ekipo cual su persona a milita henter su carera di futbolista, Aruba Jrs. For di cual ekipo Watty a wordo selecciona pa hunga den bond di Antillas Hulandes. Hungando pa tanto Aruba Jrs. como pa seleccion di Antiyas Hulandes, ta contra hopi clubnan y seleccionnan internacional Watty a hunga.

Banda di futbol Watty a demostra interes den e mundo di musica tambe. Su persona hunto cu Echi Odor, Mando y su ruman Tito Flores, Shon Tin Tromp tur den feliz memoria y Alwin Toppenberg a funda e conhunto Los Duques.

E unico conhunto Arubano cu a wordo contrata pa toca na e inauguracion di nos prome resort hotel na Aruba, esta Caribbean Hotel and Casino, cual awe ta Radisson. Otro personanan cu tambe a yega di forma parti di Los Duques ta Toti Arends dfm, Yubi Toppenberg, Dolfi Quilotte, Joy Kock, Luis Ogenio, Sogo Orman dfm, Herman 'Moca' Moscat, y Rafael Gomez. Los Duques ta e prome conhunto na Aruba cu a presenta cu un mucha muher como cantante den persona di Leda Vasquez dfm.

Watty a bay scol na St. Dominicus College caminda el a obtene su MULO- diploma. Despues di esey el a obtene su diplomanan di adjunct-commies y di abogado. Watty pa varios aña a cubri e posicion di sub-hefe di e departamento di Domeinbeheer.

Watty tabata vice presidente di Jaycees di Antillas Hulandes y miembro di directiva di Toastmasters di Aruba den cual organisacion el a forma su mes e.o. como orador publico. Watty ta fundado di Centro di Barrio di Playa

Pabao y a forma parti di e prome directiva di e centro di barrio aki. Tambe den sindicalismo Watty tabata activo como presidente di ANAAB (SEPPA).

Watty ta co-fundado di partido MEP, fundado di partido RUBA, cual despues na 1982 a uni forsa cu partido AVP, partido cu Watty a keda miembro te cu su fecha di fayecimento. Watty a haci su debut den politica na aña 1971 ora cu su persona hunto cu Betico Croes, Daniel Leo y Efreem de Kort tur dfm, a funda partido MEP. Desde debut di Watty den politica y te na eleccion di 1997 cual por cierto tabata e ultimo eleccion cu el a participa, semper el a wordo scogi cu votonan preferencial.

Durante su carera den politica Watty a ocupa e siguiente puestonan; 1971- 1973 miembro di eilandsraad, december 1973- december 1975 minister di husticia y vice premier di Antillas Hulandes den gabinete Evertsz, mei 1976- februari 1977 diputado y alaves miembro di eilandsraad, 1977- 1985 miembro di eilandsraad, 1 januari 1986- februari 1989 minister di husticia di Aruba den gabinete Eman I, februari 1989- september 1994 miembro di Staten, 1 september 1994- 6 januari 2001 minister di husticia y obra publico di Aruba den gabinete Eman II y III.

Dia 16 di augustus 1975, despues di hopi lucha y contra tempo, Watty a logra pa Aruba haya su propio scol di polis, cual por cierto desde dia 16 di augustus 2002 ta carga su nomber. Na september 1975, Watty tabata lider di e delegacion di Reino cu a delibera cu Venezuela e frontera maritimo entre Reino Hulandes y Venezuela. Tambe su persona como miembro di oposicion (RUBA) a forma parti di e delegacion Arubano consistiendo di gobierno insular di Aruba, sindicato y comercio, cu a biaha pa Hulanda despues di e sucesonan di augustus scur na 1977.

Tambe Watty tabata miembro di e comision di Reino cu tabata atende cu e relacionnan estatal dentro di reino Hulandes, esta e intereilandelijk topperleg, Antilliaanspoor. Como tambe miembro di e delegacion Arubano na e dos

conferencianan di mesa rond na Den Haag, Hulanda, na 1981 y 1983, na unda cu a fiha e futuro estructura estatal di Aruba, cual resultado final tabata e status aparte.

Hopi ta e personanan di reino Hulandes cu ta considera Watty como un constructor di brug pa dialogo y consensus. Como tambe un contribuyente importante den e relacionnan entre e miembronan di reino Hulandes.

Pa es motibonan aki y mucho mas cu nos no ta menciona den e articulo aki, pa nos Fundacion no tin motibo valido pa scrap number di Watty Vos for di e Scol di Polis. Ainda ta na ora pa esunnan concerni recapasita y evita pasa pa historia como esunnan cu a habri e porta pa den futuro scrap reconocimiento otorga na yunan di tera. Pa motibo cu no ta e golpi cu bo tira (awe) lo determina ta con fuerte bo ta, pero ta e golpi di (mañan) cu bo por absorba lo determina esaki, e comunicado ta finalisa.

"No ta e golpi cu bo tira lo determina ta con fuerte bo ta, pero ta e golpi cu bo por absorba lo determina esaki."

